




Do iss die **KERWEREDD** 1998

vumm **Rainer Hannemann**, wohnhaft in Ebbschdää, de meischde Leit bekannt als unsern **Kerweborsch**, **Kerwe-Mussigger**, **Kerwe-Fußball-Kigger**, **Kerwe-Schdimmungs-Schännie**, **Hochsee-Angel-Schbezialischt**, **AG-Vorsitzender** unn näwehär noch **Mänätscher** bei de **Bahn-AG**.

Ich grüße all im Kerwezelt - vom Tennis-Club hier aufgestellt für unsere Flomersheimer Bürger, sogar von Eppstää kommen rüber, auch vun Lambsem, Studdrem, Beindersheim sind Kerwegäst in Flomersheim. Ich blicke in ein volles Zelt und grüße auch den Rest der Welt.

Der Kerweborsch, der soll jo saa, was im letzten Johr so war. Ich schaute hinter die Kulissen und erzähl euch jetzt moi Wissen - nach dem Motto eh und je: Allen Wohl und keinem Weh. Manchmal ernst, manchmal Humor, kommt in dieser Rede vor, nach bestem Wisse unn Gewisse, die, die es trifft, werns schlucke müsse.

Guck ich in die Zeitung noi, denk ich, Ortsvorsteher müßt mer soi. Den Staatsjob hat er aufgegebe, zu wenig Geld, langt net zum lebe. Ein neuer Job war bald gefunde, doch des hott einige gestunke. Ich hab gehört von Klüngelei und SPD-ler müßt mer soi, vunn Amtsausnutzung usw., mein lieber Gott, das wird noch heiter. Doch hab ich fer mich gedacht, in Bonn wirds einem vorgemacht, do wern Pöstcher hin unn hergeschobe und da geht es um Millione. Ein Recht auf Arbeit jeder hat, so steht es im Gesetzesblatt. So kommen wir der Sach schor näher, das gilt auch fer de Ortsvorsteher. Auch in der Rheinpfalz konnt mans lese, die Sach wer net ganz sauber gewese, de OB hätt auch soi Händ im Spiel, ob das stimmt, man weiß nicht viel. Der beschwerte sich beim Presserat: "...die Rheinpfalz, die macht mich malat, die haben sich auf mich eingeschossen, die haben was gegen uns Genossen!". Sein Einwand wurde abgeschmettert und Frau Klag-Ritz jetzt weiter meckert. Und noch ein Tip von dieser Stelle an den OB noch, auf die Schnelle: Soll einem der Job noch Freude bringen, dann steht man über solchen Dingen.



Wenn ich so durch die Straßen geh und die Wahlplakate seh: "Weltmeister für Deutschland" oder "Ich bin bereit" - was fer große Sprüch, ihr Leit. Doch viel mehr bin ich gespannt, auf die Wahlen hier in Stadt und Land. Im nächsten Jahr, da ist's soweit, noch vor de Kerwe: Wahlkampfstreit. In Flomersheim, ich seh es schon kumme, wern aach wieder große Reden geschwunge. "Wir sind die Beschte, uns müßt ihr wähle, die Annere duns Volk nur quäle, ich will Ortsbeirat noch wern, die Annern, die ham eh kä Herrn!". Solche unn noch annre Sprüch kehrt ihr am Beschte unner de Disch. Also immer auf dem Teppich bleiwe, kää große Sprüch, net üwertreiw. Politisch fair soll Wahlkampf sein und so macht ihr's auch in Flomersheim. Merkt es eich und macht kä Fehler, das ist der Auftrag von uns Wähler. Doch uff Politiker schimpfe, dass es kracht, dess macht nur der, der garnix macht, der sich nirgends engagiert, der nur wartet, was passiert, um dann mit seiner großen Klappe demokratisch Gewählte nieder zu mache. Sowa kann ich garnit leide, Ortspolitiker sind nicht zu beneide und das ist ernst gemeint, ihr Leit, sie opfern Geld und freie Zeit für uns und unserm Vorort hier, das Sitzungsgeld langt grad fer's Bier. Und will er der Frau mal was Gutes tun, dann wird nix drauß: AG-Sitzung! An dieser Stell ich danke sag, an Ortsvorsteher und Ortsbeirat, an politisch und sonstwie Engagierte - Prost, jetzt muss ich die Kehl mol schmiere.

Vor zwanzig Jahre, liebe Leute, gab's keine Kerwe, keine Freude und so hawwen sich über Nacht die Zwiwwelböck ans Werk gemacht. Und was ich euch jetzt bericht, ist nicht erfunde, nicht gedicht, denn ich war damals schon dabei, bei der Auferstehung der Kerwe in Flomersheim. Alles war improvisiert, aber es lief wie geschmiert. Vorm Bahnhof hawwense aufgetischt, ohne Zelt und fast kein Licht. Strom und Wasser hott die Bahn spendiert, die wusstens bloß net, ich hat's kapiert: Maul halte und nix erzähle, dann tut uns aach kaa Rechnung quäle. Und auf Jürgen Wassmuss' Lkw-Anhänger, da saß ich mit meine Sänger. Zum erstem Mal in Flomersheim, 20 Jahre sind's derweil. Und wie es heute um die Kerwe steht, ihr alle hier und heute seht. Die Kerwe hier un Flomerschumm ist d e r Treffpunkt fer Alt und Jung. Und damit das auch so bleibt, appelliere ich an euch, ihr Leit, laßt die Kerwe niemals sterbe, tut sie weiterhin vererbe, an die, die uff de Reitschul sitzen und im Autoscooter flitzen. Laßt uns noch lange fröhlich sein, bei de Kerwe hier in Flomersheim.

Ich könnte hier noch viel berichte und noch so manches Reimche dichte, könnt aach noch e Bissel schenne, könnt aach Roß und Reiter nenne. Doch so was, das muss nicht sein, das passt besser in die Fasnacht rein. Und nach dem Motto: "Froh und heiter", geht jetzt gleich die Kerwe weiter. Denn mit Frohsinn und Humor kommt einem die Welt gleich anders vor. Lasst die Sorgen all zu Haus', lasst doch hier die Wutz heraus. Drumm feiert fröhlich die vier Kerwetage, ich bin dabei, gar keine Frage. Und am Kerwemittwoch geh ich heim - es grüßt euch: De Kerweborsch aus Flomersheim.

Die 3 Weise ausem Morgeland dreffen am Schdall in Bethlehäm oi. Ähner will gradwegs uff die Gribb zugeje unn dabbt dodebei direkt in enn Kuhbladdscher. Wie er die Bescheerung an soine goldne Sandählicher bedracht, greischer : "**Jesses!!!**" - Do drehd sich die Maria zu ehrrn Mann rumm unn sescht: "Heer Josef, där Name deht merr viel besser gfaller als wie Detlef!"

De FCK

Erinnerunge vumm
Flomerschummer
Klaus Hoffmann
an soi ehemoolische
Hinnerpälzer Jugendzeit.



Die Palz iss schdolz uff de FCK. Deitsche Määschder
isser jedzd worre unn hott em Reschd vunn de 1. Liga
mool gezeigt, wumerr de beschde Fußball schbielt.

Awwer schunn glei nochem Kriech waren die Betzeberch-Kigger Schbitze,
bloß noch nit so beriehtm. Domols hänn die Leit noch net so viel se esse
ghatt wie heitsedaags unn desdeweche sinn die Lauderer als zu
Freindschaftsschbiele uff die Derfer gfare; dort hänn de Fritz Walter unn
soi 10 Kumbane ferr e guudes Schbiel enn Sagg Grummebere, Flääsch,
Obschd usw. vunn de Baure griggt.


Ämool sinn se ah in unser kläänes Derfel in de Hinnerpalz kumme. Isch
kann eisch saache, dess war de roinschde Feierdaag ferr die Oihoimische.
Jeder iss zum Schbiel gange, nadierlich ah isch als klääner Feecher vunn
domols um die 8 Jahr. Meer waren uns nadierlich dodriwwer klar, daß die
teschnisch besser sinn als unser Mannschaft; annererseids hammer se
ausgelacht. Die waren jo all so rabbelderr, hänn nix uff de Ribbe ghatt.
Unser Elf dodegäche, dess war'n die reinschde Tarzans. Als Baurebuuwe
hänn die genug zu esse ghatt.

Mit moine Schulkamerade war isch ähner Asichd: "Die globbe merr - net
hoch, awwer 2:0 weer ganz guud". Also, meer schdellen uns hinner dess
FCK-Door unn isch kann eisch saache, es ging ah glei guud los. Unsem
Schdurm rennt los unn eh sich die Lauderer verguggen, häßt's 1:0 ferr
uns. Guud ferr unser Mannschaft, awwer net ferr mich. Die hänn nämlich
noch kä Doornetze ghatt in dere Zeid unn de Ball iss merr direkt an de
Deetz gefloh! Eh isch gewißt hab, wass do bassiert iss, bin isch umgefall
unn hann minuddelang die Engelscher singe heere: " 1:0 - 2:0 - 3:0 - 4:0 -
meer hänn gewunne!!!" Ach Godd, war dess enn schääne Draam.

Nooch einischer Zeid kumm isch widder zu merr unn froog die viele Leid
um misch rumm: "Unn, war dess net enn dolle Siech? Wie isses dann zum
Schluß ausgange, wie hoch hammer dann gewunne?" - "Vunn weeche",
kummd do die Antwort, "nix gewunne, de FCK hott uns 10:1 geklobbt".

(Anm. d. Red. - Schaad, daß de Autor nit schunn domools in Flomerschemm gewohnt
hott, do hedden nämlich die Laudrer vunn die Flomerschmer Kigger e Paggung griggt!!!)

Schdaabaus 1953



vunn Katharina Schladt, geb. Selzer

Vor etliche Jahr hab isch in Flomerschumm im Winkel gewohnt. De Friehlingsofang war enn sunnische Daag.

Isch war ugfehr 4 Jahr, do hab isch vunn moiner Mamma enn schääne Schdaabaus-Schdegge mit ganz viel bunde Babierschlaufe griggt. Owwe druff uff de Schbitz vunn demm Schdegge war e riesische Brezzel.

Die Mamma hott merr moi Sunndaagsglädche agezooge, moi Hoor in zwää Zepp gflochde, enn Hahnekamm gschdeggt unn dann hab isch naus gedirft. Schdolz hab isch moin Schdegge gedraage, dassen jeder gsehe hott. An de S-Kurv hab isch dann gschdanne. Do sinn viel Schuulkinner mit ehre Brezzelschdegge geloffe unn hänn Friehlingslieder gsunge. Dess hott merr guud gfalle. Isch wollt ah e Liedche singe, awwer meer iss im erschde Moment nix oigfalle. Uff ämool hab isch's ghatt. Moi Tante hott misch mool ähns gelernt. Isch bin im Winkel ruff unn runner geloffe unn hab aus voller Kehll geblärrt:

***"Uffem Agger, do hoggen zwää Kagger
unn hänn kä Gloopabier.***

***Sie nehmen die Finger, die niedliche Dinger
unn schbielen damit Glawier".***

Dess Kischefenschder war uff unn moi Mamma hott merr zugheert. Vor lauder Schregg iwwer moi "schäänes" Liedche hett se sich beim Grummbearscheele beinoh in de Finger gschnidde. De Babba hott misch uff de Schdell roihole misse. Moine Gschwister unn moine Eltre war dess schunn poinlich, awwer all die anre Leid in unsrer Nochberschaft hänn sich amisiert unn hänn driwwer gelacht.

Kinnermund

- vunn M. L. Hartmann

"Oma, isch hett so gäärn e Barbie-Bobb vumm Grischdkinnel", hott die klä Laura zu ehre Großmudder gsaat. Dess hott ehrn Babba gheert - unn der iss e bissel wass Besseres - unn hott glei gerufe: "Dess kummt iwverhaupt net in Froog, so enn Kitsch kummt merr nit ins Haus. Wann so enn Schambl kaafscht, dann iss was los!!".

Wie de Babba drauß war, froggt die Klä ehr Oma: "Oma, känne merr dess Jahr net ohne de Babba Woihnachte feire?".


Ferr Gläägärtner unn Großgrundbesitzer

vunn Erwin Gerhard
aus Frankedahl



Gar mancher hott enn glääne Gaade
unn blantz mit Eifer dort Tomaade,
Radieselcher unn Koppalaad,
roode Riewe unn Schbinaad,
Karodde unn aach Sellerie -
doch dess macht enn Haufe Mieh.
Schunn zeidisch geht's im Friejohr los -
an de Händ gibt's manchie Bloos.
Do duut merr häggle unn ah graawe,
baut Voggelscheische gääge Raawe,
dann de Arger mit de Raube,
midde Bladdleis unn de Dauwe,
die in de Beede scherm unn picke -
denne uff de Belz zu rigge.
Gamit äfach iss die Sach,
willscht mim Umweltschutz känn Grach.
Doch die Naduur, dess iss e Glick,
hilft sich oft selwer mid'me Trick:
Ähner vunn de greeschde Schregge

iss so enn Iggel ferr die Schnegge.
Unn gäge Bladdleis, liewie Zeit,
blantz merr Lawendel, dess iss gscheit.
Do fang'n die Fregger a zu renne,
weil se denn nit leide kenne.
Geschde ab unn zu mool hie
unn gießschd mit abgschdonnener BrieH
vunn Brennessle, hoscht Ruh - gugg hie,
unn alles ganz uhne Chemie.
Brobier's mool aus, willsch't's nimmi misse,
merr muß sich bloß zu helfe wisse.
Gäh Schnooge brauchschede ah kä Pille,
muscht bloß im Gaade eifers grille.
Dess wääscht ah uhne daß isch's saach,
die hänn wass gäge digge Raach.
Kannschd noch wass schbachtie owwedroi
unn dodezu ä Gläsel Woi
odder e Bier, dess iss doch wass -
Do macht ähm so enn Gaade Schbaß.



SUMMERZEIT - ERDBEERZEIT vumm Walter Wirth

Bei's Münche im Gaade waren die Erdbeere reif.
Awwer dess waren jo so viel, die hänn se gamet
alminanner verwerdschafde kenne. "Isch hool mool schnell in
de Bäggeri Reuther enn Bodde, denn kämmer dann mit
Erdbeere belegge", hab isch zu de Fanny gsaat. Wie der Kuche dann
ferrdisch war, hänn sich die Fanny unn de Bernhard jeder e Schdiggl devunn
abgschnidde. Isch war so heefisch unn hab gfroogt, ob noch jemand e Schdiggl
devunn hawwe will, awwer 's hott sich kanner mäh gemeldt. Dass der Kuche net
kabudd geht, hab isch de Reschd komplett nunnergedreht unn mit zwää Flasche
Frankedahler Bier nohgschielt.
Dass war moi beschdes Friehschdiggl im Flomerschummer Bahnhof!!!



Christl Müller erinnert sich im Zillerdaal an ehr Kindheit.

's war ganz hinne drauß in Mayrhofe. Ganz allää bin isch do rummschbaziert unn hab vunn weidem enre Heerd Kinner zugeguggt. Wie isch dann neher kumme bin, hab isch ball moine Aage nit gedraut - meer isses wie in Blitz in de Kopp gschosse: Die schbielen jo "Higgelschers" - genau wie meer friejer am Falder.

Mit farwischer Kreide war des "Higgelmännel" uff die Schdrooß gemoolt. Enn große runde Grääs als Kobb, senkrecht in zwää Hälfd e gedäält - unne dra e Haisel als Hals - dann war enn große Kaschde, dess war de Bauch, rechts unn links devunny, dess warn die Äärm. Vunn de Mitt aus sinn nochemool zwää Käschdelscher nooch unne gange, ferr die Bää.

Unn so iss dess Gschbielt worre: Do hott merr enn flache Schdää hiwwe nuff unn driwwe nunner gekiggt, uhne uff die Linie zu drääde.

Ganz in Gedanke versunke hab isch denne Kinner zugeguggt unn dann drifft misch schier de Schlaag, wie isch seh, daß die Buuwe sogar e aldi Feil in de Hand hänn. Die hänn se dann gschmisse unn immer enn Schdrich gezooge - genau wie friejer bei uns.

Wann jo moi Leit nit uff misch gewaad hedden, hedd isch die Kinner gladd gfroogt, ob isch bei demm Schbiel e bissel mitmache dirft. Isch hett ah jedem e Eis schbendiert. Awwer isch hab jo widder zurigg gemißt.

Uff jeden Fall hott misch dess Erlebnis ganz sehnsuchtsvoll an moi Kindheit erinnert.

Bei uns dehääm gib'ts heidzudaag bloß noch Combjuder, Gäämboys unn Innleinsgääder. Eigentlich isses schaad, daß heit alles erschd mool viel Geld koschde muß, wann die Kinner wass zum Schbiel wullen. Unser Schbielzeig friejer hott faschd nix gekoscht, unn meer hänn beschdimmt mäh Schbaß ghatt, wie die Kinner heit.

Die folgende zwää Beidrääg schdammen vunn 're treue
Flomerschummer-Gebabbel-Heft-Lesern,
de Martha Christmann vunn "driwwe", vunn Ebbschdää.




Die Nudel

Beim Fuhrknecht Busch do gibt's heit Nudle. Er isst se
arisch gern, de Busch. Uff ämool greischt soin Glääne
hinneriwwer: "**Vadder, do hängt e Nudel an doine
Gusch!**". Emm Busch soi Fraa halt ebbes uff ehr
Bildung unn greischt ganz bloo vor Wut: "**Wie kannscht
du Lauser bloß Gusch saage, zu doim Vadder soine
Schnuut?!?!"**.

's Knoddelbiewel

's war emool e arm arm Knoddelbiewel, liest Knodde uff de Schdrooß. Do
kummt e Audo hergeraddert - grad uff dess Biewel los. Do greischt de
Fahrer owwerunner: "Gehsch nerreweg, du Lumbebu!". Gleich bringt
dess Biewel näwe riwwer, greischt hinneno unn ruft demm zu: "Gell
schdinke kennder Schritt ferr Schritt, awwer Knodde mache, dess
kennder net.



...unn dess hott die Annette Ebrecht vunn ehre Oma gelernt:

Morschens um Zehne hawwisch Verlange noochme Wärschdel - gugg isch
zum Fenschder naus, schdeht e klä Bärschel draus. "Na", sag isch, "geh
mool roi moin Glääner, do hoscht ah zwää Zehner. Ferr de ähne hohlschd
merr e Lewwerwärschdel unn ferr de anner e Griewewärschdel! Schbring! -
Griggschd a was ferr's Laafe". Dess Bärschel schbringt so schdolz dohie.
Isch waad unn waad unn denk debei: Jetzt isses uff de Rääs! - Gugg isch
do zum Fenschder naus, schdeht immer noch dess klääne Bärschel draus
unn greunt unn schniebst. "Na", sag isch, "hoscht enn Zehner verlore? 's
koscht dich ah nit doi Ohre." - "Nä", seschder, "isch hab vergesse iwwers
Laafe, ferr wellen Zehner isch soll's Lewwer-wärschdel kaafe?"

Des Graizwordrädsel - oder genauer gsaat 's Waagrechdrädsel hot desmool de **Peter Kuhn** vumm Gsangverein zammegschdellt. Er hot gemähnt: " ..dess hänse glei haus ". Awwer do bin Ich mer garnit so sicher, weil nämlich des Leesungsword In de digg umrahmde Käschedscher vunn owwe nooch unne gelese aach uff pälzisch gschriwwe iss !

Uff alle Fäll brauchener desmool nit de Redagzion de Buggel vollzuschelde wanns zu schwer iss, -nääh, Ehr können glei dem Urhewer de Roschd runner mache. So, bevoorner jetzerd do näwe draa schdaawen, noch schnell die Uffleesung un die Gewinner vum ledschde mool.

Dess hätten Ehr im Gebabbelhefd 5 rausgrije misse :

1= Zwitscherschdubb 2= Muggefugg 3=Schbitzkigger 4=Schoggelgaul
5= Bohnekraidl 6= Matzeraage 7=Trollschobbe 8= Wergelholz
9= Quadratlaadsche 10= Kibbeschdescher 11= Sibbemacher 12=
Waggelpeder 13= Olwerdolwer 14= Kinnerreitschul 15= Quetschkommod

Leesungsword : **Weihnachtsmarkt**

oigange sinn **43** richdische Leesunge

Es hawwen gewunne:



6 Flasche AGF-Sekt - Rosa Peter aus Ebbschdää


4 Flasche AGF-Sekt - Anni un Heinz Fischer aus Ellerschdadd

2 Flasche AGF-Sekt - Hildegard Lotter aus Frangedaal

Flomerschummer

Waagrechdrädsel

midd senkrechder Leesung



DIE FROOCHÉ:

1= KÄ GRAADES GRUNDNAHRUNGSMIDDEL 2= RAUM, WU GLIGGSBRINGER RUMMLIGGEN
3= DO SUCHD MÄR GERN DRINN RUMM, UNN DANN KUMMEN SE OWWE DRUFF 4=
VERSAUDER BEIDEL 5= LAAFD RUMM WIE E VOGGELSCHAISCH 6= UUGEZIWNER
ZUM BLAGADE FESCHDMACHE 7= SCHDISCHD HAUPDSÄCHLICH IM FRIHJOO
8= UNSER NOCHBERVÖLKE 9= WANN S DAUERND TRÖBBSELD 10= ÄÄFÄLLISCHER KERL
(ABFÄLLISCH) 11= SCHBILKINNERWÄGGELSCHÉ 12= ALDES GEWÄSSER IN FLOMERSCHUMM

Des Leesungsword in denne digg umrahmde Käschedelscher (Pfeil) widder schnell uff e Schdiggel Babbier gschriwwe un ab ins Ruppe ehrn Briefkaschde an de Elwetridschezuchtfarm in de Fränsemer Schdroos 107 bis schbädschdens 5. Dezember noigschmisse.

Viel Gligg winschd Eiern R.Wirth

De erschde Mehdräscher im Dorf

Vor iwver 40 Jahr iss in unser Flomerschemm de erschde Mehdräscher kumme. Ehr Leid, war dess domools e Neiischkeit, so e Monschdrum in unsere schmale Schdreeßelscher. Jedic Kurv war e riesisches Hinnerniss unn de Mayer's Oddel, der do owwe uff dere Maschin ghockt hott, hott jedesmool uffschdeije unn am Lenkrad kurwle unn riggwärds unn vorwärds ranschiere misse, um am Falder in die Eisebahnschdrooß zu kumme - dess war e gewaldisch uffregendie Sach ferr uns junge Schbunde. Jedesmool beim Schalde vunn de Gäng hott's gegracht unn in Ruck gewwe unn der ganze Koloss hott gewaggelt. Demm arme Oddel sinn die Schwääßperle iwvers Gsicht geloffe unn hänn ehr Schbuure hinnerlosse. Vunn demm Grach iss sogar de Balze Franz uff die Schdrooß gerennt - unn schunn hott ähner vunn denne Eggeschdeher ans Schowalders gerufe: "Franz, zieh de Bauch oi, dass er um's Egg kummt!". Vielleicht war's de Schduck odder de Sambo; uff jeden Fall hott die ganz Bloos gelacht, de Balze Franz iss vor lauder Ärger ins Schwitze kumme unn hott sich middem Saggduch soi Gsicht abgebutzt. "Leggt misch am Arsch", hodder gerufe, hott sich uff soi Fahrrad gschwunge unn iss in Richtung Bahnhof geradelt. Die fresch Bagaasch ans Schowalders hott naderlich widder gegröolt. Jedesmool, wanner in die Pedaale gedräade hott, hänn die Feddre vumm Sattel gequitscht - unn der war so groß, wie de Sitz vumme Heiwender. Dess hott jo wirklich ulkisch ausgehe, der Franz mit soim digge Bauch unn soin große Hinnre uff demm riesische Sattel. Meer hedden jo ah gärn gelacht, meer waren awwer noch e bissel zu jung unn hänn dess noch nit gedirft.

In dere Zeit iss in jedem Hof Schdroh rummgfloooge unn all die Männer unn Fraue, die am Mehdräscher gschafft hänn waren braungebrennt vunn de Sunn, unn vumm Schdaab war die Haut schwarz bis in die Ohre unn die Naselescher. Dess war schunn e schwerie unn armie Zeid unn drotzdem schenner unn gemiedlicher wie heit. Noochem Feierowend, wann die Leid gewesche waren unn dehääm zu Nacht gesse ghatt hänn, dann hänn se noch all vor ehre Hofdoore ghoggt unn hänn verzehlt. Die Kinner hänn noch e bissel gschbielt, Noochschbringschers gemacht unn die Ohre gschdellt unn gelauert, was die Alde so gebabbelt hänn.

Jetzt rooden emool, wer isch bin. Isch wohn zwar schunn lang nimmi in die Eisebahnschdrooß (Falterschdrooß), awwer isch sammel alles, was misch an Flomerschumm erinnert - vunn de Ortsfahn bis zum "Flomerschummer Gebabbel". Isch hoff, daß dess Hefdel noch lang erscheint. Wann sich e paar mäh Leit was oifalle lossen unn schreiwens uff, dann hämmer all noch lang unser Frääd beim Lese.

Isch griëß alle alde Flomerschummer unn die neie naderlich ah. - D. F.

Lewwerknepp unn Kannsdrauwewoi

Beim Bernhard im Gaade waren moor widder die Kannsdrauwe reif. Er unn de Wirthe Walter wollten ubedingt emoor selbschtgemachte Kannsdrauwewoi ausbrobiere. De Bernhard, als alder Neischdatter, hott sich mit de Woiherschdellung beschsens ausgekennt. Die Fanny hott die Dinger gerobbt, de Bernhard hott se durch die Flääschmaschien gedreht. Die Brie hännse dann in e Dreißisch-Lidder-Fässel gschitt, Zegger dezu unn rummgerieht. In de Zwischezeit hott de Walter de Dääg ferr die Lewwerkneedel zurechtgemacht (so wie im "Gebabbel-Heft" Nummer 1). Wies dann soweitwar ferr die Kneedel zu koche, war känn große Hawwe zu finne. Die Fanny war grad nit dehääm, sunscht hett merr do ähner geläht. Do hänn die Zwää korze Fuchzeh gemacht - de blescherne Butzäämer schäh ausgewesche, Salz noi unn Wasser druffgschitt. Dann hännse de Dienschd-Owwe im Biro uffgeheizt, de Butzäämer druffgschdellt unn gewaad bisses agfange hott zu koche. Jetzt die Lewwerkneedel noigschmisse unn zwanzisch Minudde ziehe losse. Unn weil die Dinger so brima gschmeggt hänn, hännse se glei rutzebutz verdriggt - bloß uff ehm Kannsdrauwewoi hännse noch e verdel Johr waade misse.

Die "Maffia vumm
Flomerschummer
Bahnhof"



Dess Guude Schdigg...

Unser Nachbarin iss jo e gloori Seel- un n verzehle kann die, ich glaab dess machd se sogar noch liever als wie Schdrimb schdobbte.

Neulich hott se mich grad mool widder im Gaade gsehe un n iss glei an de Zau n kumme. „Un n Nachbar, wie gehts, wääschd schunn...“ Do war mer glei klar, dass ich fer heit de Resche abschwenke kann. „...Schdell dää mool vor,“ hott se gsaat „hawwisch doch die schää gold Brosch verlohre, nu ich am Geburtsdaag gschengd gried habb. Ich kammer nit vorschdelle, dass märr diie ääner geklaud hott“. Dodebei isse immer widder e bissel vor un n zurigg, rin nwer- un n rin nwer gedribbeld un n hott im Gras un n zwische de Kaschdännjeblädder gsuchd, ob sich dess edle Dää net doch widder find. An nwer wie's hald so gehd, s war fort.

Schbeeder iss dann eh n Enkel, de Kai kumme. Der hilfde als un n machd in de Kerch die Liederdaafle fer Sundaags aa, weil sie so e glääni Worzel iss un n doo nit richdisch nuff kummd. Wie se sich dann die ferdisch Ärwet aageguggd hänn un n er so hinnere schdehd, seschder pletzlich: „Sag emool Oma, iss dess jedzd modern, dass märr die Brosche uffem Buggel dreschd?“ - Doo hott se erschdmool gschduudz.

Dann isse ausre rausgschbrudelt: „Ach Godd mei Buusche - jasses wann ich Dich nit hett...“ tausend Worde „...ich bin jo sooo froh - da hoschd zwanzisch Mark - wass hedd ich dann uuhne Dich gemachd - ob ich däss Ding jemools widder gried hedd...“

Der arme Buu hott erschd garnet gewissd was jedzd los iss, an nwer in nwer de Finnerlohn hodder sich dann doch gfräät. So war jedem gholfte, bloos ich war midd moine Ärwet net ferdisch worre.


Ich glaab, wann se sich jedzd als im dunkle eh n Pullower aaziehd, dann guggd se denooch in de Schbiggel, ob de Ausschnidd a wurglich uff de richdisch Seid iss.




De "Dehdschdmerr"

Enn Tatsachebericht vumm heidische Ruheschdändler
unn ehemoolische Kerweborsch - Reinhold Lutz

Kummschd du in de Ruheschdand,
do waad uff dich so allerhand.
Wann du glaabschd, jedzd hescht doi Ruh,
kummd jeden Daag noch mäh dezu!
Grad fiehlschd du disch mool rischdisch frei,
dann geht'se los - die "Dehdschdmerr".
"Dehdschdmerr" - häßt jedzd die Parole -
"- e Lääbche Brot beim Bägger hole?"
Iss irgendwu mool hiezudabbe -
dess macht jedzd alles unsern Babbe.
Ja, als neijer Ruheschdändler
werschde schnell zum Oikaafs-Pendler.
Laafschd durch die Schdadt mit Brot unn Flasche,
sieschd Männer als mit volle Dasche -
unn dann falld zum Drooschd deer oi:
"Dess missen Leidgenosse soi".
Kummschd du dann hääm zu doiner Fraa,
dann wääschd, jedzd fangt's vunn vorne ah.
Die "Dehdschdmerr" geht widder los,
die Wunschlischd iss unendlich groß:
"Dehdschdmerr net de Mill ausleere,
-dehdschdmerr net de Hausgang kehre,
-dehdschdmerr net moi Greiz oireiwe,
-dehdschdmerr net enn Zeddel schreiw,
-dehdschdmerr net die Fenschder butze,
-dehdschdmerr net die Hegge schdutze,
-dehdschdmerr net de Dääg ariehre,
-dehdschdmerr net de Hund ausfiehre,
-dehdschdmerr, dehdschdmerr, s'heert nit uff,
hunnert mool die Drepp enuff.
Ja, do kannschd halt nix dro mache,
als "Dehdschdmerr" hoschde nix zu lache.
So bidder iss die Wirklichkeit:
Enn Ruheschdändler hott nie Zeid.



De Flieger unn die Bierflasch



Enn Tatsachebericht vumm
Walter Wirth - bassierd 1957

’s war in de segsde Glass beim Lehrer Liebrich. Währendem Unnerricht hänn e paar vunn unser Glass Babierflieger g’falde. Moin Kusäng Hannes unn isch hänn die Dinger am besche hiegriet. In de große Paus war dann de Hannes als erschder uffem Schuulhoof. Mit Schwung hodder soin Flieger in die Luft gschmisse - dess Ding iss senkrecht hoch wie e Rageed, umgekibbt unn kerzograd widder runner gsaust, wie enn Schdää. Dess war net so guud. Dann hab isch moi Kunschdwerk abgschosse. Der Abbaraad hott erscht drei Runde gedreht unn iss dann - zack - iwverde Zaun vumm Schuulhoof nausgesegelt. So e tolli Maschien derf nit verlore gehe, hammer uns gedenkt, denn suche merr widder. Isch hab middem Hannes ausgemacht, wer denn Flieger zuerscht find, der derfen ah behalde.

So klää wie isch domools war, so schnell war isch ah. Glei hab isch mein Subberflieger im Gebisch entdeggt, bigg misch unn heben uff. Im selwe Moment wie isch widder hoch geh, hab isch enn Schlaag uff moi rechdie Schdernseit griggt. Nooch’re Schreggsegund hab isch emool hiegelangt - moi Hand war voller Bluud. Was war dann do bloß bassierd? - Moin Kusäng Hannes hott schdadd denn Flieger e leerie Bierflasch gfunne ghatt unn wollt’se uff’me Schdää uffglobbe. Moi Besch war halt, daß isch in demm Moment graad hinnerm gschdanne hab, wie der zum Schlag ausgholt hott. Awwer anschdad vorne de Schdää zu dreffe, hodder hinne moin Ferrnsl verwischt. ’s Ergebnis war: Bladzwund am Kobb.

Zufällisch war emm Diehle Hannsel soi Oma am Bahnhof; die hott misch uffem Gepäckdrääger vunn ehrrm Fahrrad zum Dogder Schmidbauer im Gemäänehaus g’fahre. Der hott merr dann e Teddanus-Schbritz verbasst, mit drei Glammre dess Loch im Kobb rebariert unn e riesisches Blaschder druffgebabbt. Seit dere Zeid hab isch kä Flieger mäh gebaut.

(Do hott wohl der Kusäng dess Wort "Ba-Bier-Flieger" zu wertlich genumme -Red.)

Vergissmoinnischd

vunn de Christ Müller



Jsch geh im Wald schbaziere unn bin ganz dief in Gedanke, seh vor meer nit die grie-grau bemooste Bääm, die voller Efeuranke hängen. Jsch heer nit mool die Veggel singe unn de Guggug ruft ah ummesunscht.

Schunn soo oft hab isch meer de Kopp verboche: "Wass iss wohl de Sinn vumm Lääwe???"



Grad kumm isch an e klä Bäschel, gugg nuff, wie dess Wasser aus dere Quell schbrudelt, do seh isch owwerhalb vunn demm Schdää enn greßere blaue Fleck. Blihen do Vergissmoinnischd wie dausend glääne Schderne. Die Aage guggen misch so o, dass isch vunn denne Blimmel-scher wass lerne kann: Im Schdille unn in Bescheidenheit, vunn niemand beacht, wachsen se in de Einsamkeit, blihen, verwelken unn vergehn. Genauso iss de Laaf vumm Lääwe, e Weilche därfscht du bliehe, därfschd Frääd schenke unn ah Glick unn muscht dann weiderziehe. Unn wann dann Ähner doiner gedenkt unn disch noch lang nit vergißt, weil du ihm wass Guudes gedo hoscht, - unn wannder dann Ähns e Blimmsche blanzt unn sescht: "Dess iss de ledschde Gruß vunn meer, enn Schdrauß Vergissmoinnischd!" - wanner derr schenkt dann e Gebäät, kennscht du de Sinn des Lääwens, umsunscht hoscht du do nit gebliht, hoscht nit geläbt vergääwens.



Grach in Flomerschemm

Wer glaubt, dass isch jetzt was iwver dess Theader um unserm Ex-Ortsvorschdeher schreib, der iss schief gewiggelt. Dess iss e Thema, bei demm ähm grad die Wordde fehlen. Obwohl - isch glaab jo, dass schunn lang nimmi soviel iwver Ebbes gebabbelt worre iss, wie grad dodriwver. Awwer do hett merr guud druff verzischte känne.

'S war nämlich ah so genug los in Flomerschemm. Gebaut worre iss in demm Jahr, fascht so wild wie in Berlin. Amool hab isch neun Baukrane gezeit. Im Klääfeld sexe, am Bahnhof zwää unn im Kärchegässel hott ah so e vergessenes Munschdrum ewisch rummschdanne unn hott Worzle gschlagge. In Ebbschdää hab isch bloß zwää Krane gsehe. Ach, was missen dess do iwwe ferr arme Leit soi.

Uff jeden Fall war bei uns in Flomerschemm de Deiwel los. Krane, Bagger, Laschdwägge, Beddoonaudoos, Dregg unn Grach, monadelang. Dess war als ball nimmi zum Aushalde. Hämmer hinne die Deer uffgemacht, hänn die Bagger vumm Glääfeld gejault, hämmer vorne uffgemacht, hott die Schdadwerke die Fräänsemer Schdrooß uffgerisse. Do weer merr am Liebschde in Urlaub gfare. Na, ja, jetzt iss jo 's Schlimmschde iwverschdanne unn meer hoffen uff e ruhisches 1999. - Aller dann - Walter Rupp aus de Unnergass

DREHER-DRUCK

Mikrofilm-Consult GMBH

Hannongstr. 27

67227 Frankenthal

Telefon (0 62 33) 2 72 42 - Fax (0 62 33) 2 75 52

Dess war's mool widder ferr heit. Leider hott's dessmool bloß ferr 1 Ausgaab gelangt. Wann genug Beidrääg beisamme sinn, woll'merr im negschde Jahr widder e Hefdel rausbringe. Schäh weers, wann Sie uns e bissel helfe kändden. Zuschrifde bidde bei's Ruppe in de Fräänsemer Schdrooß 107 abgewwe, egal ob hochdeitsch odder päzisch.

Die Flomerschummer Arweitngemeinschaft wüschd alle Fääns vumm "Flomerschummer Gebabbel" e guudes 1999.

Gsamtgshdaldung: Walter Rupp - Rädseise: Reinhold Wirth - Ogdober 1998
Gedruggt wie immer ferr "UMME" vunn unsre Haus- unn Hofdruggerei Klaus Dreher.

Dank schäh ah.